

ԶԱՆԱԶԱՆ ՏԵՂԵԳՈՒԹԻՒՆՆԵՐ

Ա.

ԱՅՐԻԱՅԱԾ ՔԱՀԱՆԱՆԵՐԻ ԿՐԿՆԱՄՈՒՄՆՈՒԹԵԱՆ ԽՆԴՐԻ
ՄԱՍԻՆ ՄԻ ՔԱՆԻ ԽՕՍՔ.

Յայտնի է որ Վեհափառ Հայրապետը, ի նկատի ունենալով թէ ժողովրդականների և թէ այրիացած քահանաների կողմից տրուած բազմաթիւ խնդիրները դրական կերպով լուծելու վերջիններիս երկրորդ ամուսնութեան խնդիրը, նոյնպէս և այն կէտը, որ այդ խնդիրը լինելով ոչ մասնակի այլ համահայոց, պարունակող թէ հասարակական և թէ կանոնական որոշ հանգամանքներ իւր մէջ, հրամայել էր շրջաբերական կոնդակներով Սոյ կաթուղիկոսին, Պօլսոյ և Երուսաղէմի Պատրիարքներին, Սինօդին, որ դրանք առաջնորդների ձեռքով խառն ժողովներ գումարեն և տան իրանց դիտումները և կարծիքները վերոյիշեալ խնդրի նկատմամբ։ Առ այժմ կաթուղիկոսական Դիւանը ստացել է Սոյ կաթուղիկոսի և երկու պատրիարքների գրութիւնները, որոնք բացասական մտքով են պատասխան դրել յիշեալ հարցի նկատմամբ, այդ երեք գրութեան մէջ մի մեծ բաց կայ, այդ այն է, որ այդ կարծիքները միմիայն հոգեւորականներինը է, իսկ ժողովրդի ժողովական կարծիքի մասին ոչինչ տեղեկութիւն չկայ, այն ինչ թէ կոնդակներով էր այդ պահանջուած և թէ խնդրի էութիւնը էր պահանջում որ ժողովրդի կարծիքը լսուէր, այն հասարակ պատճառով, որ քահանաները գործում են ժողովրդի մէջ, կրկնամուսնութեան խնդիրը մեծ առնչութիւն ունէր ծխականների նիստուկացի հետ, ուստի և կարծիքներ ժողովելիս Սոյ կաթուղիկոսը և պատրիարքները ու Պօլսոյ կրօնական ժողովը պիտի մեծ տեղ տային ժողովրդական ձայնին, այդ տեսակէտով երեք գրութիւններն էլ միակողմանի են և խնդիրը այժմէութեամբ չեն բացատրում, Երուսաղէմի Յարութիւն պատ-

րիարքը համարելով հակակեղեցական, միանգամայն մերժում է այդ խնդրի դրական լուծում՝ տալու հարցը. «համեմատեցաք զայն ընդ օրէնս եկեղեցւոյ և գտաք հակառակ օրինաց. ուստի համամիտ և համաձայն որոշեցաք ամենեքին զգուշանալ ի քակելոյ զցանկ»: Յետոյ համարելով օրէնքը փորձառութեան վրայ հիմնուած մի դրութիւն, անում է մի շատ անարամաբան եզրակացութիւն — «զի օրէնք հիմնեալ են ի վերայ փորձառութեան, պարտ է պահել զայն ըստ ամենայն սահանջեալ պայմանացն, լուծանելով զմին յօրինաց՝ լուծանին մի ըստ միովէ ամենեկեանս»:

Ասոյ կաթուղիկոսի պատճառաբանութիւնները նոյն ոգով են գրուած ինչ որ Յարութիւն պատրիարքի, չի կարելի «խրամատել զօրէնադրական կաղմակերպութիւն Ս. եկեղեցւոյ, վասն զի եթէ զաւակունք այրիացեալ քահանայից մնան կարօտ մայրական խնամատարութեան, մնան և զաւակունք այրիացեալ ժողովրդականաց, յորոց բազումք ոչ կամին մտանել յերկրորդ ամուսնութիւն», այս ձևի են գրութեան բոլոր դատողութիւնները սոյն խնդրի վերաբերմամբ, որոնք շատ հեռու են խնդիրը պարզաբանելու տեսակէտից և չունեն ոչ մի արժէք ժամանակակից հայեացքների առմամբ:

Այդ գրուածքներից պատճառաբանուած է Պօլսոյ պատրիարքի և կրօնական ժողովի կողմից ուղարկուածը, որն արժէ ուշադրութեան առնել, Քահանաների կրկնամուսնութեան խնդիրը մերժելու աղբիւրներ համարում են առաքելական օրէնքը, թէ սարկաւազները պիտի լինին «միոյ կնոջ այր», սոյն սովորութիւնը բոլոր եկեղեցիք պահած են, նոյնպէս և մերը, նոյն հիմամբ էլ չի թոյլ տրուում այրիացած աշխարհականների ձեռնադրութիւնը, ինչպէս և Մաշտոցում որոշակի գտնուում է մինչև չորս աստիճանի ամուսնանալու իրաւունքը և հինգերորդ աստիճանից սկսած չամուսնանալու արգելքը: Ապա խօսելով քահանաների ամուսիններ փնտռելու տգեղութեան և անյարմարութեանը վրայ, նոյնպէս և չամուսնացած և

այրի մարդկանց քիչ տոկոս չլինելուն (նրանք ի նկատի են ունեցել Պօլիսը) վերաբերմամբ և այն մասին որ երկրորդ ամուսնութեան մէջ մտնել ցանկացող քահանայք կարող են թողնել քահանայութիւնը և պսակուել իբրեւ աշխարհական էլի նոյն առաքեալի խօսքի հիման վրայ թէ «ոչ ունիցին ժոյժ, ամուսնացին», գալիս է այն եզրակացութեան որ չպէտք է թոյլ տալ քահանաների կրկնամուսնութիւնը։ Այսպիսով Տաճկահայոց բարձր հոգեւորականութիւնը բացասական պատասխան է տալիս ժողովրդի ձայնը չի լսուած։ Ստացուել է նոյնպէս Սմերթկայի երեսփոխանական ժողովի վճիռը, որով խնդրում են ոչ միայն քահանաներին թոյլ տալ կրկին ամուսնանալու, այլ և կուսակրօն հոգեւորականութեան թոյլ տալ ամուսնանալ և վերացնել ամուրիութիւնը, առ այժմ չենք լսել Ռուսահայոց թեմերի և Սինօդի կարծիքը, նրք կստանանք բոլոր կարծիքները, կտանք ընդհանուր հայեացք կանոնական և եկեղեցական ժողովական տեսակէտից, թէ արդեօք հաւատակ է կրկնամուսնութիւնը եկեղեցական ժողովների կանոններին թէ ոչ, թէ առաքելական օրէնքը «միայ կնոջ այր» խօսքով միանգամայն ժխտում է կրկնամուսնութիւնը թէ ոչ, այդ հարցերին կպատասխանենք յետոյ։ Առ այժմ կտամ հետեւեալ հարցերը հակառակօրէններին։ Ո՞վ է ճշմարիտ քրիստոնեան և աւանդապահ քահանան, նա, որ երկրորդ ամուսնութեան մէջ է և ողջախօհ, թէ նա, որ այրի է և գայթակղութեան քար։ Ո՞վ է շիտակ մարդը և աւետարանի աշակերտ, նա որ երկրորդ ամուսնութեամբ ապրում է, խիղճը հանգիստ, կատարում է ճշտութեամբ իւր վրայ դրած սրբազան պարտքը, թէ նա, որ չի պսակւում երկրորդ անգամ հակառակ եկեղեցական օրէնքի համարելով, և ծածուկ ու աշկարա խայտառակութեան տիպար հանգիստանում։

Աւետարանը պարզութիւն ու մաքրութիւն է պահանջում, նա չի կարող երկրորդ պսակ չի կարելի՝ պատրուակով անբարոյականութեան տեղիք տալ, այդ հիմունքով շատ ժողովրդականներ ստիպում են այրի քահանային տնկալուջ պահելով ողջախօհութեան սահմանից դուրս չգալ։ Առ այժմ այսքան։

Բ.

ՊԱՇՏՕՆԵԱՆԵՐԻ ԸՆՏՐՈՒԹԵԱՆ ՄԱՍԻՆ

Վեհափառ Կաթողիկոսը ի շարունակութիւն իւր նախկին տրուած կոնդակների, հրամայել էր ընտրութիւններ կատարել Աստրախանի թեմում Արխտակէս արքեպիսկոպոսի փոխարէն, Ալէքսանդրոպոլում Արսէն վարդապետի և Ղզլարում Թովմա վարդապետի փոխարէն: Աստրախանում երկաստիճան ընտրութիւն կատարուեց և ընտրուեցին Բագրատ վ. Վարդազարեան և Մեսրոպ վ. Տէր Մովսիսեան, որոնց հրաժարումից յետոյ, հրամայեց Վեհափառը նոր ընտրութիւններ կատարել ուղղակի ձևով յենուելով Աստրախանի կոնսիստորիայի ցուցման վրայ:

Ալէքսանդրոպոլի փոխանորդի ընտրութիւններին Ղեկավարում էր Յուսիկ եպիսկոպոսը, ընտրութիւնները կատարուել են ոչ հեշտութեամբ և ուղղակի ձայնաւութեամբ համախօսականների միջոցով, ընտրուել են Կարապետ և Մուրադբէկեան վարդապետները, առաջինը առաջարկուած է ի հաստատութիւն:

Ղզլարում դեռ չեն կատարուել ընտրութիւններ:

Տաթև պիտի նշանակուի նոր ընտրութիւն, երբ ձմեռը անցնի և ճանապարհների հաղորդակցութիւնը բացուի: Տաթևի նախկին փոխանորդ Ներսէս վարդապետ Դիւանապետ նշանակուելով, առ ժամանակ թափուր մնացած աթոռի համար նշանակուեց Խորէն վարդապետ հսկելու ցորենների բաշխման վրայ մինչև նոր ընտրութիւնների կայանալը:

Ընտրութիւնները լինելով նոր ձև պաշտօնեաների և ժողովրդի համար, սկզբներում հարկաւ դժուարութիւններ պիտի առաջացնէին, մանաւանդ որ մեր ժողովուրդը սովոր չէ կանոնաւոր ընտրութիւններ կատարելու. միշտ ձգտում է իւր սովորութեան համեմատ ազանների ձայնով ամեն ինչ վերջացնել, որից ծագում են վէճեր, պառակտումներ և կուսակցութիւններ, որոնց արդիւնքն լինում է այն՝ որ

Ժողովուրդը վերջ ի վերջոյ ստիպուած է լինում համախօսականով դիմել Վեհափառին նշանակելու իւր ցանկացած անձանց պաշտօնի մէջ. այդ հիմամբ Վեհափառը առաջնորդ ուղարկեց Դաւրէժ եղնիկ արքեպիսկոպոս Ապահունուն, որը արդէն մտել է իւր պաշտօնի մէջ և հովոււմ է Ատրպատական: Նոյնպիսի դժուարութեան հանդիպեցին և Ալէքսանդրապոլում: Ընտրութիւններ չհամար վերջնական և կանոնաւոր օրէնքներ կնշանակի միայն Կեդրոնական Ժողովը, որի ընտրութիւնները կնշանակուին երևի Դումայի նիստերից յետոյ:

Այդ հիմամբ և Սինոդի նոր անդամների ընտրութեան խնդիրը ըստ նախկին կոնդակների մնաց մինչև Բ. Կեդրոնական Ժողովի կայանալը, ուստի և Վեհափառն անհրաժեշտութիւնից ստիպուած Սինոդի կազմը լրացնելու համար առաջարկեց Մեսրոպ, Մխիթար և Եղիշէ վարդապետներին ի հաստատութիւն, համարելով Սինոդի համար Ռուսահայոց բոլոր թեմերի պատգամաւորների միջոցաւ ընտրութիւն նշանակելը անյարմար և գուցէ աննպատակայարմար, որովհետև Ներսէս Ե-ի գծած շաւիղը, այն է թէ Սինոդի, թէ կոնսիստորիաների և թէ հոգեւոր կառավարութիւնների անդամների կէսը աշխարհականներից ընտրելը աւելի համապատասխան է մեր եկեղեցու ոգուն, քան այժմեան միակողմանի ձևը, իսկ այդ կարող է անել միմիայն Բ. Կեդրոնական Ժողովը:




Գ.

ԳՊՐՈՅԱԿԱՆ ԾՐԱԳՐԻ ՄԱՍԻՆ

Յայտնի է որ Ուսուցչական համագումարը Տփլիսում մշակել էր և տպել տուել «կանոնադրութիւն և ծրագիր հայոց եկեղեցական տարրական դպրոցների», այս ծրագիրը քննութեան ենթարկուեց Ա. Կեդրոնական Ժողովի ուսումնարանական սեկցիայի մէջ, թեթև փոփոխութիւն-

ներով ընդունուեց բոլոր ժողովի կողմից և վաւերացրուած առաջարկուեց կաթուղիկոսին: Կեդրոնական ժողովը աւելացրեց կրօնի նկատմամբ հետեւեալ ծանօթութիւնը «կրօնի դասերը պարտադիր չեն այն երեխաների համար, որոնց ծնողներն այդ կպահանջեն»: Վեհափառ Կաթուղիկոսը հետագրական հրամանով պատուիրեց Կեդրոնական ժողովի կողմից ընդունուած ծրագիրը գործադրել ուսումնարաններում մի տարուայ փորձով առանց կրօնի վերաբերեալ վերոյիշեալ ծանօթութեան, հրահանգելով կրօնի դասաւանդութիւնը պարտաւորական դարձնել բոլոր դպրոցներում: Բ. Կեդրոնական ժողովը ի նկատի ունենալով նախորդ փորձերը ծրագրի նկատմամբ, երեւի կտայ աւելի վերջնական ձև ծրագրին և կանոնադրութեան և տպագրելով կհրահանգի գործադրել կաթուղիկոսական վաւերացմամբ:

Այս տարի չյաջողուեց թեմական խորհուրդների, թեմական տեսուչների կարգումը և գործաւարութիւնը, առաջին՝ Կեդրոնական ժողովի վաղաժամ փակմամբ, և երկրորդ՝ գաւառներում տիրապետող քաղցից և սովից տառապման պատճառով:




Դ.

ԹԵՄԱԿԱՆ ԴՊՐԱՆՈՅՆԵՐԻ ԾՐԱԳՐԻ ՄԱՍԻՆ

Վեհափառ Կաթուղիկոսը կամենալով միօրինակութեան վերածել մեր դպրանոցների ծրագիրը՝ աչքի առաջ ունենալով այն գլխաւոր հանգամանքը, որ դպրանոցները պիտի լինին այնպիսի ուսումնարաններ, որոնցից աւարտածները լինին գործնական անձինք՝ պիտանի ազգային հաստատութիւններին և ծառայող ժողովրդի պէտքերին, հրամայեց ձեմարանի, Ծուշուայ, Ներսէսեան, Նոր-Նախիջևանի, Երևանի և Աստրախանի վարիչներին և հոգաբարձութիւններին ընտրել գործին հմուտ անձինքներից բազկացած մասնագիտովներ՝ կազմելու մանրամասն ծրա-

գիրներ բոլոր առարկաների՝ բոլոր դասարանների համար և ներկայացնել ոչ ուշ քան 1907 ապրիլի 1-ը: Այդ ստացած ծրագրերը նորին Օծուծիւնը մտադիր է յանձնելու ապագայ գումարուելիք Բ. կեդրոնական ժողովին քննելու, մշակելու և ներկայացնելու Իրան վերջնական տնօրէնութեան: Ծրագիր կազմողները ի նկատի պիտի ունենան այն կարևոր հանգամանքը, որ աւարտողները գթութեամբ թիւն չզգային մտնելու Ռուսաց բարձրագոյն դպրոցները:



Ե.

Ժամանակն է պահանջում, թէ վանականութեան ներքին կեանքի փոփոխութեան կարիքը, վարդապետները և սարկաւազները հետզհետէ թողնում են հեշտութեամբ վեղարը մի պարզ հրաժարական յայտարարութեամբ և այդ թղթի կտորին ստորագրելուց յետոյ իրաւունք համարում աշխարհականի շոր հագնել և հոգևոր կազմից դուրս գալ:

Ընդունելով հանդերձ, որ կրօնական խղճի ազատութիւնը թոյլ է տալիս առանց այլևայլութեան թողնել այն կոչումը, որը իւր կամքի և յոժարութեան համապատասխան չէ, յամենայն դէպս ժողովրդական և 1900 տարուայ աւանդական կարգերը պահանջում են, որ վարդապետ դարձողները լրջութեամբ վերաբերուեն այդ հարցին, տարազը փոխելով և թղթին ստորագրելով հեշտութեամբ ամեն ինչ վերջացած համարած չլինին, եկեղեցին, իւր կազմը, աւանդական կարգերը, հոգևորական կոչումն էլ իրանց կողմից ունեն իրանց բարոյական մաքսիմներն:

Այսպէս մի քանի ժամանակ առաջ թողել է վարդապետապետութիւնը՝ 1) Եղնիկ Գեանջեցեան, 2) այս տարի թողել է Արսէն Ղլտճեան, 3) թողնում է Թովմա վարդապետ, 4) հրաժարուել է Ներսէս Թոմաաղայեան: Սարկաւազութիւնը թողել են՝ Գրիգոր, Սմբատ, Կոստանդին, Չուբարեան սարկաւազները:

2.

ՄԻ ՔԱՆԻ ԽՕՍՔ ԽՆԱՄԵԱԿԱՆ ՉՀԱՍԻ ԵՒ ԽՈՐԹՈՒԹԵԱՆ ՄԱՍԻՆ

Վեհափառի այս համարի կոնդակը խնամէական չհասի մասին լրացուցիչ դէպք է այն պակասին, որ զգացւում է մեր մէջ։ Մեր քահանաները մինչև իսկ կոնսիստորական ատեանները խնամէական աստիճանները սխալ են հաշուում, այդ սխալը իմ կարծիքով չհասկանալուց է առաջ գալիս և աստիճանների էութեան չըմբռնելուց, 5 աստիճանը համարում են 4, 6 աստիճանը 5, այդ մտքով միշտ դիմում են Սինոդին և Վեհափառին թոյլտուութիւն խնդրելով, որը ապացոյց է այն բանին, որ նրանք զգում են իրանց հաշուի սխալը և 4-րդ համարուած աստիճանը թոյլատրելի. այդ խնդիրը միանգամ ընդ միշտ պարզելու համար արձակուած է այս համարի կոնդակը։

Աստիճանների հաշուելը շատ հեշտ է և կատարւում է այսպէս։ Ամէն մի ծնունդ մի աստիճան է. երկու եղբայր երկու ծնունդ են, երկու աստիճան են, նոյնպէս երկու քոյր երկու աստիճան են, որովհետև երկու ծնունդ են։

Մարդ և կին ամուսնանալով հաշւում են «մէկ մարմին» իրանցից ծնուած զաւակների համար. մարդ և կին երկու ծնունդ են, ուրեմն երկու աստիճան իրանց երկու կողմերի համար։ Ահա ձևակերպութիւն։ 0—0 ամուսիններ։

Ենթադրենք կնոջ անունը Աստղիկ է, մարդուն անունը Տիգրան. Տիգրանի քոյրը Զարուհի և Աստղիկի եղբայրը Արշակ գտնւում են չորրորդ աստիճանում, որովհետև Տիգրան և Զարուհի երկու աստիճան են, Աստղիկ և Արշակ նոյնպէս երկու աստիճան, միասին կլինեն 4 աստիճան։

Զարուհին Արշակի հետ գտնւում են չորրորդ խնամէական աստիճանում, որը և անթոյլատրելի է։ Մեր քահանաները այս ձևակերպութիւնը համարում են երրորդ աստիճանի, ինչո՞ւ. նրա համար որ ամուսիններ Տիգրան և Աստղիկ համարում են իբրև մի մարմին—մի աստիճան, որ ակներև սխալ է, որովհետև դրանք մի մարմին են կազ-

մում միմիայն իրանցից ծնուած որդիների համար և ոչ իրանց եղբարց և քոյրերի նկատմամբ, որոնց հետ ջոկ ջոկ վերցրած երկու ծնունդ են՝ ուրեմն երկու աստիճան: Զարուհու տղան Մանուկը և Արշակի աղջիկը նազլուն զըտնում են վեցերորդ աստիճանում:

Մեր քահանաները համարում են 5 աստիճան այն հիման վրայ, որ ամուսիններին նոյն սխալ հաշուով համարում են մի մարմին մի աստիճան: Կոնդակը հրամայում է հաշուել ոչ 5 աստիճան այլ 6, ինչպէս որ հաշում են բոլոր քրիստոնեայ եկեղեցիների կանոնիկոսները:

Ե՛րբ է մարդ և կին մի հաշուում. միմիայն մի դէպքում. ա՛յն է իրանց զաւակների նկատմամբ. օրինակ եթէ Տիգրանը և Աստղիկը զաւակ են ունեցել ձեռներկութեան մէջ 0—0 այսպէս չեն զծագրւում, հապա միացած այսպէս՝ 0, որոնց զաւակը այսպէս—0 ծնողք

0 զաւակ:

Այս ձևով եթէ հաշուեն մեր քահանաները ամենեւին չեն սխալուիլ և բարձր ատեաններին դիմելու հարկ չի լինիլ. քանի որ վեցերորդ աստիճանի թոյլտուութիւնը իրանցից է կախուած:

Խորթութիւնը կարող է լինել ազգակցական և խնամէական, բայց ընդհանուր առմամբ խնամէական պիտի հաշուել. խորթութիւնը միշտ մի աստիճան աւելացնում է. օր. եթէ պարզ հաշուով 4 աստիճան է և խորթութիւն կայ մէջը, պէտք է՝ խորթութիւնը մի աստիճանի առաւելութիւն տուող հաշուելով, համարել պարզ հաշուով 4 աստիճանը 5 աստիճան. օրինակ. Զարուհին և Արշակը 4 աստիճան են, եթէ Զարուհին Տիգրանի խորթ քոյրն է, այդ դէպքում խորթութիւնը մի աստիճան համարելով, կստանանք որ Զարուհին Արշակի հետ 5 աստիճանի խնամէութեան մէջ են գտնւում:

Առ այժմ այսքան:

Է.

ԿՆԻՔԱՆՈՐԱԿԱՆ ՉՀԱՍԻ ՄԱՍԻՆ ՄԻ ՔԱՆԻ ԽՕՍՔ

Վեհափառ Կաթողիկոսը ազգակցական 7-րդ, խնամական 5-րդ և կնքաւորական 3-րդ աստիճանի պսակների թոյլաւութիւնը դիւրացնելու համար հրամայեց Կոնստանտնուպոլսի անուամբ արձակած շրջաբերական կոնդակներով իրաւունք տալ բոլոր հոգեւոր Կառավարութիւններին, Բագուի, Բայազիտի և Ախալքալակի և Բեսարաբիայի ու Աստրախանի թեմերի գործակալներին թոյլ տալ վերայիշեալ աստիճաններում պսակներ կատարել: Կնքաւորական աստիճանները պէտք է համարել ըստ ճիւղադրութեան Ներսէս—Ե-ի, այն է մինչև երրորդ ծնունդ. որը պիտի հաշուել այսպէս, սանիկը և կնքահօր որդիքը գտնուում են երկրորդ աստիճանում իբրև եղբայրներ, սանիկի որդին կնքահօր կամ սանամօր առմամբ թողն է, ուրեմն երկրորդ աստիճանումն է, սանիկի որդին և կնքահօր որդին երրորդ աստիճանի մէջ են, ուրեմն իրաւունք չունին պսակուելու, սանիկի որդին և կնքահօր թողը չորրորդ աստիճանի մէջ են, կարող են պսակուել:

Իսկ սանիկի և կնքահօր կողագիծները, այսինքն եղբայրներ, քոյրեր, մօրաքոյրեր, հօրաքոյրեր չեն մտնում կնքաւորական չհասի մէջ, նրանք բոլորովին անկախ կարող են խնամութիւն անել միմեանց հետ:

Կնքաւորութեան հետ առնչութիւն ունի և խաչքաւորութիւնը, երբ մէկը միւսի պսակի ժամանակ խաչը բռնում է, համարւում է նրա խաչ-քաւորը, սորա համար որոշ կանոն չունենք, միայն կարծում եմ որ խաչքաւորը իրաւունք չունի ամուսնանալու նրան հետ, որի խաչը բռնել է, և ընդհակառակը վերջինս խաչքաւորի կնոջ հետ:

Բոլոր թեմերի գործակալներին այդ իրաւունքը չտրուեց այն հիմամբ որ նրանցից շատերը կիսակիրթ են, չհասի աստիճանները չեն կարողանում որոշել և կարող էին սխալանքների մէջ ընկնել. իսկ Բագու, Բայազիդ, Ախալքալակ գործակալ նշանակւում են առհասարակ վարդապետներից, Բեսարաբիայի և Աստրախանի թեմերը ընդարձակ են և համեմատաբար աւելի պատրաստ քահանաներից գործակալներ ունեցող:

Ն. Վ. Մելիք-Թանգեան.